

## Script of Morning Gojri News Bulletin 24 December 2024 at 1015Hrs

مارننگ گو جری نیوز بلیٹن مورخہ 24 دسمبر 2024

\*\*\*\*\*

یوہ آکا شوانی جموں ہے باغ علی طاہر تیں خبر سنو۔

### CM Power Supply

وزیر اعلیٰ عمر عبداللہ نے کل متعلقہ افسراں نانہہ ہدایت کی ہے جے بجلی غی کمی غا معاملہ غو آزالو کیو جا ئے، تے شہریاں نانہہ خاطر خواہ ضروری خدمات غی دستیابی نانہہ یقینی بنایو جا ئے۔ وزیر اعلیٰ نے جموں ماتہہ اپنی تمام مصروفیات نانہہ رد کرتاں واں وادی ماتہہ بذات خود بجلی محکمہ غی کا رکر دگی غی نگرانی کرن غو فیصلو کیو ہے۔ جت ان دنان ماتہہ سردی غی سخت لہر چل رہی ہے۔ انہاں نے وادی ماتہہ بجلی غی صورتحال غو جانزو لین غی خاطر اک اعلیٰ سطحی میٹنگ غی صدارت وی کی۔ انہاں نے میٹنگ غے دوران افسراں نانہہ ہدایت کی جے وادی ماتہہ سخت سردی غا دنان ماتہہ رہایشیاں نانہہ بجلی غی خاطر خواہ سپلائی نانہہ یقینی بنایو جا ئے۔ وزیر اعلیٰ نے بجلی محکمہ غا افسراں نانہہ ہدایت کی ہے جے وے بجلی ماتہہ کٹوتی غا اوقات غا پروگرام ور سختی سنگ عمل کریں، تے بلا شیڈیول بجلی کٹوتی تیں پرہیز کیو جا ئے۔

\*\*\*\*\*

### Dy Sanik School

نا ئب وزیر اعلیٰ سریندر کمار چودھری نے کہیو ہے جے طالب علماں نانہہ معیا ری تعلیم مہیا کران غی لوڑ ہے۔ تانجے ان ماتہہ نظم و ضبط غو احساس دوايو جا سکے، نالے ان غی شعوری صلاحیتاں ماتہہ بابدو کیو جاسکے۔ اُن غو کہنو تھو تعلیم نہ چھڑی طالب علماں ماتہہ نظم و ضبط پیدا کرے بلکہ نوجواناں غی روحانی صلاحیتاں ماتہہ وی با بدو کرے۔ جس نال مجموعی طور ور قوم غی ترقی تے خوشحالی ممکن ہو سکے۔ وے کل سینک اسکول نگروتہ غی سالانہ تقریب ماتہہ بول رہیا تھا۔ دبا نیاں تیں سینک اسکول نگروتہ غی طرفوں طالب علماں نانہہ معیا ری تعلیم مہیا کران ور اسکول غی سراہنا کرتاں واں نائب وزیر اعلیٰ نے کہیو جے اس ادارا غی طرفوں مہارا نوجواناں غا مستقبل نانہہ صحیح سمت دین ماتہہ کافی اچھو کردار رہیو ہے۔ انہاں نے کہیو جے اس اسکول تیں فارغ ہون آلا طالب علماں نے بکھ بکھ شعباں ماتہہ قابل قدر خدمات انجام دتی ہیں۔

\*\*\*\*\*

### PM Mann Ki Baat

وزیر اعظم نریندر مو دی آئندہ 29 دسمبر نانہہ آکا ش وانی تیں ”من کی بات“ پروگرام ماتہہ ملک تے بیرون ملک رہن آلا بھارتی شہریاں سنگ اپنا خیالات سانجا کریں گا۔ من کی بات پروگرام غو یوہ اُن غو 1 سو 17 ووں شمارو ویگو۔ لوگ اپنا خیالات تے تجویز ٹول فری نمبر 1800117800 ور کال کر غے روانہ کر سکیں۔ اس توں علا وہ نریندر مو دی ایپ یاہ فر مائی گوو اوپن فورم ور وی تجویز ے خیالات روانہ کیا جا سکیں۔ من کی بات پروگرام نانہہ آکا ش وانی تے دور درشن غا تمام چینلاں تیں علا وہ اے آئی آر نیوز ویب سائٹ تے نیوز آن لائن مو بائل ایپ ور سنیو تے دیکھیو جا سکے۔ اس توں علا وہ اس پروگرام نانہہ اے آئی آر نیوز، ڈی ڈی نیوز، پی ایم او تے اطلاعات و نشریات وزارت غا یو ٹیوب چینلاں ور وی سنیو تے دیکھیو جا سکے گو۔

\*\*\*\*\*

## Announcement

آکاش وانی جموں غا ریجنل نیوز یونٹ غی طرفوں 100 دنن توڑی ٹی بی غی بیماری نانہ روکن غی تیز تر مہم غا موقعہ ور 30 منٹاں غو اک خصوصی پروگرام نشر کیو جا رہیو ہے۔ یاه مہم صحت تے خاندانی بہبود بارے مرکزی وزارت غی طرفوں گذشتہ 7 دسمبر نانہ شروع کی گئی تھی۔ اس مہم ور مبنی پروگرام آکاش وانی جموں تیں کل یعنی 24 دسمبر نانہ سویر ساڈا 9 بجے نشر کیو جا نے گو۔ اس پروگرام غو مقصد لوکاں نانہ ٹی بی غی بیماری ور قابو پان تے علاج بارے لوکاں مانہ بیداری پیدا کرنو ہے۔ اس پروگرام نانہ آکاش وانی نیوز جموں ور میگا واڑ 9 سو 90 کلو ہٹز، 104 عشاریہ 5 تے 100 عشاریہ 3 ایف ایم ور سنیو جا سکے گو۔

\*\*\*\*\*

## Anti Drug Campaign

گو رنمنٹ ڈگری کالج پونچھ غی طرفوں کالج غا آڈی ٹورن مانہ با اثر منشیات مخالف مہم غی خاطر اک تقریب منعقد کی گئی۔ اس موقعہ ور ر ضلع غا ڈپٹی کمشنر وکاس کُنڈل نے مہمان خصوصی غا طور ور شرکت کی۔ اپنا خطاب مانہ انہاں نے کہیو جے منشیات غی بدعت اک عالمی للکار ہے۔ جہیڑی سرحدان، ثقافتاں تے سماجی اور اقتصادی پس منظران تیں بالا تر ہو غے اک تشویش غی شکل اختیار کر چکی ہے۔ اُن غو کہنو تھو جے منشیات غی بدعت سماجی تانا بانا نانہ نقصان پُجا رہی ہے۔ جہیڑی اعتماد مانہ کمی تے ایسا افراد غی صلاحیتاں مانہ کمی غو باعث بنے۔ اس بُرائی غے خلاف رل غے کوشش کرن غی ضرورت ور زور دیتاں وان ڈی سی موصوف نے کہیو جے اس بدعت غے خلاف لڑائی ہم ساراں غی مجموعی ذمہ داری ہے۔

\*\*\*\*\*

## Weather

جموں خطہ مانہ ہلکی بارش تے اُچا پہاڑی علاقان مانہ برفباری غی وجہ نال مغل روڈ، چہترگلا گذر گاہ تے کشتواڑ غی سینھن گذر گاہ نانہ بند کر دتو گیو ہے۔ جموں مانہ ہلکی بارش غی وجہ نال درجہ حرارت مانہ گراوٹ آئی ہے۔ کل مغل روڈ ور ٹریفک شوپیاں تے پونچھ غی طرفوں پیر غی گلی غا مقام ور تازہ برفباری غی وجہ نال معطل رہی۔ دسیو گیو ہے جے پیر غی گلی غا مقام ور 8 تیں 10 انچ برف پنی ہے۔ جد کہ بتی، بہدرواہ سڑک ور چہتر گلا غا مقام ور 6 تیں 8 انچ توڑی برف پین غی اطلاع ہے۔ استوں علاوہ کشتواڑ غا سینھن ٹاپ غا مقام ور 1 تیں ڈھیڑ فٹ توڑی برفباری ہوئی ہے۔ البتہ جموں سرینگر قومی شاہراہ ور ٹریفک غی آؤ جائی معمول غے مطابق رہی۔ موسم غی خرابی غی وجہ نال ماتا ویشنو دیوی توڑی اڈن آلی چاپر خدمات وی متاثر رہی۔

\*\*\*\*\*

اس غے نال ہی خبراں غو یوہ بلیٹن ختم ہوؤ۔